


Santa Rosa a habri aña cu instalacion di molina di biento na Calabas



ORANJESTAD (AAN): Riba dia 31 di december Departamento di Agricultura, Cria y Pesca (Santa Rosa) a duna inicio na e proyecto di reconstruccion y instalacion di molina di biento na e pos di Calabas, asina cerando aña 2013 cu un obsekio valioso na e Agricultor y Criador nan di Noord y vecindario.

Durante henter aña 2013 Santa Rosa a completa diferente proyectonan na vigor di e Agricultor y Criador nan di nos isla, cu e meta principal pa brinda sosten durante e temporada di segura cu nos isla a pasa aden y cual ta worde premira di lo continua durante aña 2014.

“Nos ta sumamente contento cu trabaonan di instalacion di molina di biento na Calabas a cuminsa, algo cu tabata forma parti di nos metanan pa aña 2013. Pa hopi tempo nos a tuma nota di e cantidad grandi di Cunukeronan cu tin den e area di Noord y den e forma aki nos kier aporta y brinda sosten den nan ofishi cual ta asina valioso pa nos pais” director di Santa Rosa, señora Nathalie Maduro a expresa.

Durante e instalacion di e molina di biento por a tuma nota di diferente Agricultor, Criador como tambe bisiñanan kende ansiosamente tabata mira con trahadornan di Santa Rosa cu amor tabata instala e molina, cual lo brinda e Agricultor y Criador awa dushi pa muha nan plantacion y cria bestia.

Tabata sumamente impresionante pa wak e beyesa di e molina di biento aki cual ta representa un sosten valioso pa e Cunukeronan di nos isla. Trabaonan riba e molina di biento na Calabas lo finalisa durante e prome luna di aña 2014 asina segurando awa dushi pa e Cunukeronan di Noord.

Pa aña 2014 Departamento di Agricultura, Cria y Pesca lo sigui traha riba proyectonan na vigor di e Agricultura, Cria y Pesca di nos pais asina segurando un produccion di stabil di productonan local pa pueblo di Aruba.